

CADASIA YACNOCQUIDON ISTE

Pabaddon tauamboen chiaid

¹ Pabado nebi. Esus chuibenecquidquio nebi. Matsesën: —Adquid icta —¿caidtabi nedi? Padenquio. Esuquidistun: —Ëbi chuibeneta —caidquio nebi. Aid uincuemenëdaid Nuquin Papantsen: —Con mado Esus chuibeneta —caidquio nebi.

² Nidaid utsi Cadasia caidën tabadquidon Esus tantiaquidon mimbi iste dada uaic nebi. Mibi tantiac unësquio iquec. Adembidi tantiec nëmbo icquido Esus tantiaquidtedi: —Unësquio iquec —quiosh.

³ Mibi tantiaquin Nuquin Papa chianembi naden. —Min Mado Esuquidistubëdtan bëdamboen isquin Cadasia yacnocquido bëdambo icmeta, Papa —quequin Nuquin Papa chianembi.

⁴ Matses bëdambo icmequid Esus nec. —Ëbi tantiesabo tabadacbimboec icsamboec tabadboedëmbi ëbi tantiasho bëdamboec tabadquid icmendambi —quiash Nuquin Papan chiacpadec abi tantiaquido cuidmenquio icnuec abided ciudadec Esus unëspac caondash.

⁵ Aidën Papa tantiaquin: —Nuquin Papa bëdamboshë iquec —canuna ënenquio icquin.

Esusuidi tantienquio yanaid

⁶ —Esus tantienquio yanosh —quequin mimbi naid chuisho tantias shubitiadquio iccobi. ¿Ëbi chonobida badedquio Esus tantienquio

yano? Nuquin Papan tantiamiac abided cuidadec unësaid Esus tantiec mibi tabadondac. Aden Nuquin Papa aton Mado Esusbëdta tantiaboedëmbi ¿nëbida Nuquin Papa tantienquio yano? Utsibon icsamboen chiaquien mimbi Esus tantienquio yanac.

⁷ ¿Aidon chiaidta bëdambo icpec? Aidon chiaid ma Nuquin Papan chiaidpenquio neyoc. Esusquio chienquio icquin muaquin chuisho tantiashun: —Abimboen cachitec —queshun mimbi Esus tantienquio yampac.

⁸ —Aton Mado Esusuidtsëqui tantiasho Nuquin Papan nuqui bëdamboen isec —quequin abimbo chiondambi. —Nuquin Papan chiaid abimbo chienquio icsho Nuquin Papan cuidpashuni —quequin aden abimbo chiondambi. Nuquin Papan abi yacnoshon uaid mayan bëdantsen muaquin chuisho tantiashun aidtsen: —Nuquin Papan cuidpashun —catsiambi. Utsibontsen muaquin chuisho tantiash aidotsen: —Cuidpashun —quiobi.

⁹ Tantia. Adembidi mibi chuinu. Ëmbi chuibanac mimbi Esus tantiabenondac. Mimbi tantiondaid Esusquio chienquio icsho: —Nuquin Papan cuidpashun —caimbi mibi muauaquin chuiquido.

¹⁰ —¿Matsesën: “Mibi bëdambo iquec,” mabi canu —quequindambi aden chuibampadi? Padenquio. Nuquin Papan chiacpadomboen mambi natiadquio yoc. —Bëdambo iquec —Nuquin Papa camenuen mambi chuibampaboc. Matsesën chiacpadomboenuidi natiapimbo iquebi. Adenuidi naic Esuquidistun yuambo ictiapimbo ictsiabi.

Esusën chiaidquo chiec nebi, quiaid

¹¹ Tantia, con utsibo. Mibitedi chuinu. — Esus tantiasho Nuquin Papan matses bēdamboen isbentsiash —quequin ěmbi chuiboed amben chiaidpenquo nec.

¹² Matsesën chiabi Esuquidistun tantiamiac ambi chiaidquo chuibanombi.

¹³ Tantia. Aden Esusën ěbi tantiamiondaid mibi chuinu. Con matses isadaidbon chiacpadomboenuidi natiadquo icquin Nuquin Papa tantiesabo danquin Esus tantiaquido comapenen chieshēnquin cuesun secatiadquo icpadenebi. Ěmbi adodened ěmbi chuisho mimbi tantiondac.

¹⁴ Nuquin Papa tantiatiadquo icquin con matsesën chiaid abitedimbo natiadquo ictenebi. Ěbēdta tishaidon caniabon bēdiactsēc natiadquo icnubi con tsusedpabon chiaiduidi natiadquo ictenebi. Adquid icquin Esus tantiaquido comapenen chieshēndenembi.

¹⁵ Adshobini Nuquin Papan aton Mado Esus tantiamiondash. Ěbi tishabi icnubi ěbi caic: —Con Mado Esus tantiameshun bēdamboen isquin

¹⁶ Pabado: “Matses utsibo isadaidpembo con Mado Esus chuibeneta,” caindambi —quequin ambi chiacpadomboen Esus tantiamiondashi. Adoac: —Esusën chiaid ěbi chui —quequin matses chambo iccondambi.

¹⁷ Shubu dadpen icquid Edusaden caid yacnocquido Esusbēd icnēdaido ambia Esus chuibanēdaido chuitanambo iccondambi. Utsibo chienquo yec nidaid utsi Adabia caid yacno matses nibēdacno badedquo nidtanondabi.

Adashic yuec-yuecpambo ictanec auëshquio choec shubu dadpen icquid Damasco caid yacnobidi choaondabi.

¹⁸ Adashic ambo nidash seta abentsëc chotsecnuc matametanec Edusaden yacno Petedo isec nidtanondabi. Adec nidash 15tedec ushec aibdëd tabadondabi.

¹⁹ Ambobi Nuquin Icho Esusën utsi Acobo caid isondambi. Esusbëd icnëdaid utsi isambo iccondambi. Aid daëdtsëqui isondambi. Utsibo padambo.

²⁰ Abimbo chuiquin nëid dada uaic nebi. Ëmbi aden chuibansho tantiash: —Ai, abimbo caic — quec Nuquin Papa.

²¹ Aden Edusaden yacno istanec choashic yuec-yuecpambo ictanec nidaid utsi Sidia caid yacno nidondabi. Auëshquio nidshun nidaid utsi Sidisia caid yacno istanondambi.

²² Nidaid utsi Udeya caid yacno Esusbëd icnëdaido yacno yuec tabadambo iccondabi. Adsho anocquidon Esus tantiaquidon isabi iccondashi.

²³ Ëmbi naid chuishouidi tantiapac caondash. —Nuquipadquid Esus tantiaquido cunesun secatiadquo icnëdaidëmbi Esus tantiabenshun Esusquo chuibeniosh —quequin ëmbi naid chuishouidi tantiapac caondash.

²⁴ Aden ëmbi naid chuisho tantiash: —Nuquin Papan nac Pabado bëdambo iquec. Adomboen Pabado tantiamec Nuquin Papa bëdamboshë iquec —quepac caondash Udeya yacnocquido.

Edusaden yacno nidoaid

¹ Yuecash seta 14ted matamiash Edusaden yacnobidi nidoapondabi. Ēbēdi Bednabe caid nidpondash. Titotsen buanondambi.

² Adec Nuquin Papan tantiamiacpadec ambo nidshun Esus tantiaquido chuiquid dapabo caidoudtsēqui cho-chomeshun ěmbi naboed chuibanondambi. —Ěmbi chiabi yac aidon: “Muequi neque. Pabadon chuisho tantienda,” canushe —qeshun naden chiondambi. —Nuquin matsespenquo isadaidpembo matses utsibo Esusquo chuibenioniombi. “Esusuidi tantiasho Nuquin Papan nuqui bēdamboen istsiash,” quequin chuibenioniombi. ¿Adembidida mimbi tantiape? —capondambi Esus tantiaquido chuiquid dapabo chuiquin. Ěmbi adoac: —Ai, adembidi tantiembi —quepondash aido.

³ Ěbēd icquid Tito caid isadaidpembo icshobi: —Shui dēbid dēteshune —cainquo iccondash chuiquid dapabon abi utsibon: —Adotiad —canubi.

⁴ Adec: —Shui dēbidien dēteshunetiad —quequido Esus tantiaquid damianquiec Esus tantiaquidombo tabadacno puduedpondash. —Esus tantiaquidon: “Esusuidtsēqui tantiasho Nuquin Papan nuqui bēdamboen isec,” quequin con tsusedpan chiaid niacsho tantianu —quiash ěbi yacno puduedpondash. Adec puduedshun tantiashic: —Mimbi icsamboen chiec. Nuquin tsusedpa Moisesēn chiampidtedi nasho Nuquin Papan bēdamboen istsiash —quepondash.

⁵ Adec aido: —Nuquin tsusedpan chiampicpadomboenuidien nametiad —qesho: —Padi.

Mimbi icsamboen chiec –quequin aidën chiacpadomboen nainquo iccondambi. –Ma matses utsibon: “Esusënuidtsëqui Nuquin Papa ëbi bëdamboen ismec,” quequin ma Esusquo tantianu –qeshun nainquo iccondambi.

⁶ Aden Esus tantiaquido chuiquid dapa caidon Esus tantiaquidën natequid utsi chienquo iccondashi. –Esus tantiabenacsho isun nuquin tsusedpan chiacpadomboentsen nameta –quequin chienquo iccondashi. ¿Esusbëd icnëdaidën; –Moisesën chiaidtsen nameta –cactambi nametsemponda? Padenquo ictsenondambi. ¿Atotsi Nuquin Papan aido capec? –Esusbëd iccondaidquo neque. Bëdamboen isnu –¿capenda iquec? Padenquo.

⁷ Naden Petedo chedon chiondashi. –Nuquin Papan chiacpadomboen mimbi matses utsibo isadaidpembo Esusën naid chuibeniac. Nuquin Papan chiacpadomboembidi Petedon nuquin matses isadaidbo Esusën naid chuibeniosh. Petedon nacpadomboen mimbi bëdamboen nac –capondashi.

⁸ –Nuquin Papan namiaid icquin Petedon nuquin matses isadaidbo dadpen Esus tantiamiosh. Adembidi Nuquin Papan namiaid icquin mimbitsen matses utsibo dadpen Esus tantiamiac

⁹ –qeshun bëdamboen ispondashi. – Adembidi nanuna. Mimbi isadaidpembo Esusën naid chuibenenubi adembidi isadaidbombo chuibenendambi –quepondash. Adshumbic: – Esus tantiaquidquo mibi nec –qeshun chuiquid dapabon Bednabebëdta mëdimbampondashi. Nëidic

Petedo. Nēidic Acobo. Nēidic Uan. Aidtedishun chuiquid dapabo icquin adondashi.

¹⁰ Nadentsen chuipondashi. —Aton na nibēdquido bēdamboen isnuna —capondashi. Adsho tantiash: —Ai, adonona —quepondabi. Adanec nidpondabi.

Antioquiya yacnoshon Petedo chushcaid

¹¹ Adash yuectaniash ēbi iccondacno shubu dadpen icquid Antioquiya caid yacno Petedo chopondash. Auēshquio icsashobimbi bēisquioquin chushcapondac.

¹² Abēdtan Esus tantiaquido matses utsibon codocaid pec bēdamboec tabadboedi aton pete isuidanec aidobēd cuēshēdec Petedo icsapondash. Ambo choash Esus tantiaquido con matsesēmpenquio codocaid pec bēdamboec tabadondash. Adnubien Acobon: —Ambo istan —cac con matses Moisesēn chiampid tantiaquido cho-chopondash. Aido cho-chosho isash: —Moisesēn chiampid niacquin matses utsin codocaid pesho chushcanushe —quec dacuēdquin isadaidpembon pete meniaid isuidampondash Petedon. Adec abēdtan Esus tantiaquido matses utsibobēd cuēshēdec icsapondash.

¹³ Adsho isash anocquido isadaidbotsen abēdtan Esus tantiaquido matses utsibobēd tabadenquio yec cuēshēdpondash. Adsho isash ēbēd icquid Bednabetsen adecbidi cuēshēdec icsapondash.

¹⁴ Adec icsaquin Esusēn chiapadomboen nainquio icshobimbi Petedo chushcapondac Esus tantiaquidtedishun tantianuc. —¿Ada mimbi bēdamboen naoque? Tantia. Chuinu. Isadaidbo tsusedpan chiaid matses utsibo mimbi namec.

Isadaidbo icquimbi matses utsibon codocaid pec aidbēdi mibi bēdamboec tabadoc. Aidon piaid pec bēdamboec tabadboedi nēbi aidbēd mibi cuēshēdoc. Adsho isash mimbi nianaido: “Petedon matses isadaidbo tabadac bimboec tabadshoudien Nuquin Papan nuqui bēdamboen ischitotsiash,” quepec icsamboen chiec. Aden mimbi icsamboen tantiameque. Tantia. ¿Atotsiequin mimbi naoque? —capondambi Petedo chushcain.

Nuquin Papan bēdamboen iste chiaid

¹⁵ Naden con matses Petedo chiondambi. — “Moisesēn chiampicpadomboen naisabo matses utsibo icsambo iquec,” quequin nuquin matses isadaidbon tantiec. Nuquien isadaidbon chidon tishacsho tsusion shui dēbid dēteshun secanēdaido nec.

¹⁶ Adquid icquin: “Moisesēn chiaiduidi naquin Nuquin Papa bēdamboen ismembi,” quedenedi nēbi nuqui utsien chiec. “ ‘Abided cuidadaid Esusēnuidtsēqui Nuquin Papa ēbi bēdamboen is-mec,’ quequin Esus tantiasho Nuquin Papan nuqui bēdamboen isec,” quequin nuqui tantiec. Adshun matses utsibobēdtambi nuqui Esus tantiaquiec. “Moisesēn chiaid niaquesa nibēdsho isun Nuquin Papan matses abitedi bēdamboen istiapimbo iquec,” quequin tantiashun nuqui bēdamboen ismequid Esus nuqui tantiabenondac —quequin Petedo chiondambi.

¹⁷ Adashic Petedobidi chui-oaic: —“Esusuidi tantiasho Nuquin Papan nuqui bēdamboen istsiash,” queshun Esus tantiabenondacsho nuquin matsesēn icsambo capondashi. “Nuquin tsusedpan chiacpadomboen nainquio yec mibi icsambo

iquec matses utsibobimboec,” capondashi nuquin matsesën. ¿Ada Esuquidistun matses icsambo icmepec? ¿Ambi chiacpadomboen naicta nuqui icsape? Padenquo.

18 “Nuquin tsusedpan chiampicpadomboen nashoen Nuquin Papan nuqui bédamboen isec,” quequin nuquin matsesën chiaid nec. Esus tantiaquin aden chuitiapimbo yanondabi. Adec Esus tantiaquid icboedi: “Padpiden con tsusedpabon chiaiduidi naquin Nuquin Papa bédamboen ismembi,” qeshun abi bédamboen ismequidquo Esus tantienquo yequini icsambo icchitotsiac.

19 Con tsusedpa Moisesën chiactedi natiadquo ictenebi. Adquid bédamboen iste danquin abitedi natiadquo icquimbi abitedi nainquo iccondambi. Adshun: “Moisesën chiactedi ambembi matsesën natiapimbo iquec,” qeshun ëmbimbo naid ënondambi. Nëbini Esus tantiec Nuquin Papan chiacpadec tabadec.

20 “Ambi con tsusedpa Moises chuimiactedi nashouidi Nuquin Papan nuqui bédamboen istsiash,” quedenedi Esus tantiec adenquo yanondabi. Nëbi ëmbi tantiaidquo nainquo yec Esuquidistubëdi cuëshëdenquo yec bédamboec tabadebi. “Ëbi tantiec ëbi cuidmenquo icnuec abided cuidadec unësac caondash,” quequin tantiashoeni Esusëmbi bédamboec tabadquid icmec.

21 “Abided cuidadaid con Mado Esusuidi tantiasho matses bédamboen isendambi,” quequin Nuquin Papan chuipanëdash. Aden Nuquin Papan chiaid niactiapimbo iquebi. Moisesën dada

uapampid ambi chiaid niaquesa icsho Nuquin Papan bēdamboen istsenac. Ambi chiaid niaquesa nibēdec. Adquid Nuquin Papan chiaid niaquesa icnuc: “Mates cuidmenquio icnuec ēbided cuidadec unēsnu,” queboedi Esus padenquio ictsempanēdash —capondami Petedo chuiquin.

3

Nuquin Papan aton Mayan tabadmiaid

¹ Tantia. —Cadasia yacnocquido piushbimboecquin tantienquio yanosh —quequin chuisho tantiashun mibitedi chuinu. ¿Tsuntsin: —Tantienda —cac Esus tantienquio yano? —“Cuesten dectanac abided cuidadaid Esusēnuidtsēqui Nuquin Papanuqui bēdamboen ismec,” quequin Esus tantiasho Nuquin Papan nuqui cuidenquio iquec —quequin mibi chuibanondambi. ¿Esus tantiatiapimboda ique?

² Mimbi tantiaid ēbi chui. Tantuanu. ¿Atotsi quiash Nuquin Papan Mayan mibēdi tabadanondash? ¿Nuquin Papan ambi chiaid Moises dada uamepampid mimbi nabanuda mibēd tabadanondash? Padenquio. Ēmbi chiondaid Esusquio mimbi tantiabensho isashien mibēd tabadanondash.

³ ¿Pabiate shēcuē choquidida mibi nendac? Tantia. ¿Atotsieshun tantienquio ique? Mibēdi tabadquin Nuquin Papan Mayanēn mibi bēdamboec tabadquid icmec. ¿Nēbi Esus tantienquio yanecta mibi bēdamboec tabadpatsia? Mibembi bēdamboec tabadtiapimboen mibi iquec.

⁴ ¿Aden Nuquin Papan aton Mayan mibēdi tabadmiaid icquimbida Esus tantienquio yano?

⁵ Nuquin Papan aton Mayan mibēdi tabadmequin comapenen tantiaquin nacnenquin mibi ismiondash. ¿Atotsieshun Nuquin Papan aton Mayan mibēdi tabadmec? ¿Con tsusedpa Moisesēn chiampid nashoda Nuquin Papan aton Mayan mibēdi tabadmec? Padenquio. Ęmbi chiondaidquio Esusquio tantiasho Nuquin Papan aton Mayan mibēdi tabadmec.

Nuquin Papa tantiaquidquio Abadauan chiaid

⁶ ¿Tsutsi Nuquin Papa tantiaquidquio icpampic? Abadauan nepampic. Nuquin Papan chiac Abadauan: —Abimbo mimbi caic —quesho: —Adquid bēdamboen isembi —queshun Nuquin Papan bēdamboen isbempampic.

⁷ Adec Abadauan: —Nuquin Papan abimbo caic —quequin tantiapampicpadomboen nēbi matsesēn Esus tantiasho Nuquin Papan bēdamboen isendac ambi Abadauan ispampicpadomboen.

⁸ —Esus tantiaquido iquendac —quequin naden Nuquin Papan Abadauan chuipampic ěndenquimbo. “Abadauan, mibi unēsan yuecquimbo ictaneshun min tsyuecquid abentsēc tantiaquidtedi bēdambo icmendambi. Nidaid utsi-utsiec yacno tabadquidon min tsyuecquid abentsēc tantiasho bēdambo icmendambi,” quequin Nuquin Papan chiaid con tsusedpan dada uapampic.

⁹ Abi tantiaquidquio icsho ambi Abadauan bēdamboen isampicpadomboen nēbi aton Mado Esus tantiasho Nuquin Papan nuquitsen bēdamboen isec.

¹⁰ Utsiboen Nuquin Papan cuidtequido nendac. —Moisesën chiampicpadomboenuidi nasho Nuquin Papan bēdamboen istsiashi —quequidēmbi abitedimbo nainquio icsho Nuquin Papan cuidendac. Aden ěnden Nuquin Papan chiaid dada uapampic. “Ambi chiactedi nainquio icsho Nuquin Papan cuidendac,” quepampic.

¹¹ —Ambembi Moisesën chiampicpadomboenuidi nasho matses bēdamboen isendambi —¿quecta icpanēdash Nuquin Papa? Padenquio. Ambi chiaid niacquiduidquio icsho bēdamboen istiapimbo icquin Nuquin Papan naden chuiquin dada uamepampic. “ ‘Nuquin Papa ambi chiacpadomboen naquidquio nec,’ quequin abi tantiec tabadquidien Nuquin Papan bēdamboen isec,” quequin dada uamepampic.

¹² ¿Ěmbembi Moisesën chiactedimbo nanuequidta Nuquin Papambo tantiec tabadpec? Padenquio. “Moisesën chiactedi naquid Nuquin Papabēd tabadendac,” quequin chiampicpaden ambembi matsesën natiapimbo iquec. Natiapimbo icsho Nuquin Papan bēdamboen istiapimbo iquec.

¹³ Aden Nuquin Papan matses abitedimbo bēdamboen istiapimbo icnuc Esuquidistu: —Ěbided cuidshun ěbi tantiaquido ma con Pan cuidenquio icnu —quiash abided cuidadec unēspac caondash cuesten dectanac. Aidquio chuiquin Nuquin Papan con tsusedpa dada uamepampic. “Cuesten dectanaid Nuquin Papan cuidaidquio nec,” quequin Nuquin Papan chiaid dada uapampic.

¹⁴ Adec matses utsi-utsien abi tantiaquido cuidmenquio icnuec abided cuidadec Esus

unëspac caondash. Ëndenquimbo con tsusedpa Abadauan chiec: —Yuecshun bēdambo icmendambi —quequin Nuquin Papan chuipampicpadomboen abi tantiaquido bēdambo icmequin aidobēdi aton Mayan tabadmenuec Esus unëspac caondash.

Abadauamba chuishun Moisestsen Nuquin Papan chiaid

¹⁵ Tantia, con utsibo. Mibitedi chuinu. Min mat-sesën nadoquid. —Naden naindambi —quequin dada uashun: —“Abimbo chiaidquio nec,” ma isquidon canu —queshun abi cuëmēdquidtsen dada uaquid. Aid dada uaid dada uaquidbēdtambi utsintsen utsi uatiapimbo icquid: —Chuiquidēn cuidnushe —queshun. Adembidi ambi chiaid utsi uatiapimbo icquid icquin

¹⁶ Nuquin Papan: —Nadomboen naindambi —quequin Abadauan chuipampic. —Mibi nibēdanan yuecquimbo ictaneshun min tsyuecquid abentsēcshun matses bēdambo icmendac —quepampic. —Min tsyuecquid abentsēc tantiaquidtedi bēdamboen isendambi —quequin tantiec adpampic. Esus caiqui: —Min tsyuecquid abentsēc —quec adpampic. —Min matses tsyuecquido dadpen —quenquio icpampic.

¹⁷ ¿Ada tantie? Ëndenquimboshē Nuquin Papan Abadauan chuiquin: —Min tsyuecquidēn mat-ses bēdambo icmendac —capampic. Adshumbic yuecquio ictaneshun seta dadpenquio 430ted matameshun Moises utsitsen chuiquin Nuquin Papan dada uamepampic. Ambi Abadauan chi-ampid niaquenquio icquin Nuquin Papan ambi

chiaid utsi Moises dada uamepampic. Muenquo icquin Abadauan chuipampic.

¹⁸ ¿—Ĕmbi chiaid ĕmbi Moises dada uamiac-padomboen nashouidi mibi bĕdamboen isembi —qeshunda Nuquin Papan Abadauan bĕdamboen isbempampic? Padenquo. Moises tishabi icnuc ambi chiac: —Nuquin Papan abimbo caic —abi casho Nuquin Papan Abadauan bĕdamboen isbempampic. Adashic: —Yuecshun min tsyuecquidĕn matses bĕdambo icmendac —quepampic. Aden ambi ĕndenquimboshĕ chiampicpadomboen nĕbi matses bĕdambo icmequin Esus tantiaquido Nuquin Papan bĕdamboen isec.

¹⁹ ¿Atotsieshun Nuquin Papan ambi chiaid Moises dada uamepampic? —Ĕmbi chiaid isash: “Icsamboequien nuqui tabadchitec,” quequin ma matsesĕn tantianu —qeshun Moises dada uamepampic. Nuquin Papan Abadauan chiampid Esuquidistu choabi icnuc adopampic. Nuquin Papan abi yacnoshon uaido mayan bĕdabon Moises chuiuampampic. Adoac Moisesĕn aton matses Nuquin Papan chiaid chuibampampic.

²⁰ Nuquin Papanquo Abadauan chuipampic. Abadauan caic: —Chuitan —cainquo icquin Nuquin Papanquo Abadauan chuipampic.

Matses abi icsaid tantiamete chiaid

²¹ Aden Nuquin Papan Abadauamba chuishumbic Moisesĕsen chuipampic. ¿Ambi: —Min tsyuecquid tantiaquido bĕdamboen isendambi —quequin Abadauan chiampid niacquinda Nuquin Papan Moises chuipampic? Padenquo. ¿Matses bĕdamboen isnuenda Nuquin Papan

ambi: –Naden nata –quequin chiaid Moises dada uamepampic? Padenquo. –Matses bēdamboen isnu –qeshun ambi chiaid Moises dada uameshun ambi chiaid niaquesa bēdamboen isun unēsacsho abēdi tabadmetsiash. –Ēmbi chiaid niaquesa nibēdendac –quequin tantiaquin ambi: –Naden nata –quequin chiaid Moises dada uamepampic.

²² –Ēmbi chiaid isun: “Nuquin Papan chiaid matses abitedishunquien niac-niacchitec. Mētaniac abembi mēnchiquidtiapimbo yacbimboec abembi bēdambo ictiapimboen icchitec,” quequin ma matsesēn tantianu –qeshun Nuquin Papan Moises dada uamepampic. Adec matses abitedi icsamboec tabadsho bēdamboen istiapimbo icquimbi ambi Abadauan chiampicpadomboen naquin Esuquidistu tantiaquidouditsēqui Nuquin Papan bēdamboen isec.

²³ Esus choabi icnuc nadquo matses icpanēdash. Moisesēn chiacpadomboenuidi natiadquidi abembi bēdamboec tabadtiapimbo icpanēdash. Mētaniac mēnchiquidtiapimbo yacbimboec aidēn chiacpadec bēdamboec tabadtiapimbo icpanēdash. Nuquin Papan Esus tantiamiabi icnuc adquo matses icpanēdash.

²⁴ Aden: –Ambi chiaid niaquec icsamboec tabadsho Nuquin Papan ēbi bēdamboen istiapimbo iquec. ¿Nuquin Papa bēdamboen ismequidta nibēdpeba? –nuqui camenuen ambi chiaid Moises dada uamepampic. Aden nuqui icsaid tantiameshun Esustsen tantiamiac: –Esus tantiaشو Nuquin Papan nuqui bēdamboen isec icsaisabimboecnuc –nuqui quendac.

²⁵ Aden tantiec: —Isadaidbo tsusedpan chi-actedi nashouidi Nuquin Papan matses bēdamboen istsiash —quenquo nuqui iquec. —Esus tantiasho Nuquin Papan nuqui bēdamboen isquin bēdamboen tabadmec —quequin nuqui tantiec.

Nuquin Papan con mado con champi caido

²⁶ Aden Esus tantiasho Nuquin Papan: —Con mado mibi nec. Con champi mibi nec —nuqui capec.

²⁷ Adec: —Esus tantiaquid nebi —quesho acten mentoaid yec Esuspadquo ictiadquo nuqui iquec.

²⁸ Aden Esus tantiasho Nuquin Papan nuqui bēdamboen isec. Isadaidbo yec isadaidpembo yec matses yuaido yec matses yuapenquo yec dada yec chido yec quequin Esus tantiasho nuqui bēdamboen isec. —Matses utsibo bēdamboen istiapimbo iquebi —quenquo icquin matses utsibombi aton Mado Esus tantiasho Nuquin Papan bēdamboen isec.

²⁹ Adembidi abi tantiasho ambi Abadauan bēdamboen isampicpadomboen Esus tantiasho Nuquin Papan nuqui bēdamboen isquin bēdambo icmec ambi Abadauan chiampicpadomboen. Adec Abadauanën tsyuecquidobimboecquido nuqui nec.

4

Yuabimboecquid isadaidbo yaid

¹ Tanta, con matses. Mibitsen chuinu. Aton na dadpen dayun uaquidën nuquin matsesën nadoquid. —Ēbi unësan con madon con na abitedi bedendac. Bacuë icquimbi con madon con na

abitedi bedtiapimbo iquec. Canishumbien con madon con na bedendac —quequin tantiaquidën amën aton mado aden chuiquid. Aton papa unësan caniabi yec utsibon yuabimboec aton mado iquec.

² Caniabi icquin utsibon chiacpadomboen naindac aton madon. Adashic aton papan chiacpadec canishun aton papan na bedash yuabimboecboedi adquidpenquío yanendac.

³ Adquío yuabimboecquido con matses isadaidbo icpanëdash. Tsusedpabon yuabimboecquido icquin Nuquin Papan bëdamboen iste bëdamboen tantienquío icpanëdash. —Tsusedpabon chiacpadomboen Nuquin Papan: “Naden nata,” quequin chiaiduidi nanu —quiashi abembi bëdamboec tabadtiapimbo icpanëdash.

⁴ Adnubien ambi ëndenquimbo tantiampicpadën Nuquin Papan Esus chomepanëdash. Isadaidbon chidon tishaid icquin Nuquin Papan: —Naden nata —quequin chiaid naquidquío Esus nepanëdash.

⁵ Adec Nuquin Papan chiaid niaquesambo Esus icnubien ambi chiaid niacash matses abitedi Nuquin Papan cuidtequido nepanëdash. Adsho isash matses cuidmenquío icnuec abided ciudadec Esus unësaç caondash. Nëbi Esus tantiasho: —Con mado mibi nec. Con champi mibi nec —quequin Nuquin Papan nuqui bëdamboen isec.

⁶ Adec: —Con bacuëbo nec —queshun Nuquin Papan nuquibëdi Esusën Mayan tabadmec. Adoac bacuën amë: —Ëbi, papa —cacbimboen Nuquin Papa nuqui chianec.

⁷ Esus tantiabi Moisesën dada uapampiduidi na-

menuequido yuabimboecquido icboedi nēbi Esus tantiasho Nuquin Papan: —Con bacuēbo nec — nuqui capec. Aden nuqui bēdambo icmec ambi Abadauan chiampicpadomboembi.

¿Utsin yuameteda bumpe? quiaid

⁸ Tanta. Nēbi matses utsibo mibi chuoanu. Ēnden Nuquin Papambo tantiesa icquin matses uaquidpenquiobi utsi mimbi tantiapanēdac. Papa quequin mimbi tantianēdaidēn yuabo yec mētaniacimboecquido mibi icpanēdac.

⁹ Nēbi Nuquin Papa mimbi tantiabenondac. ¿Mimbembida adonda? Padenquo. Aidēmbi mibi tantiamepanēdash. Aidēn tantiamiaidombo icquin ¿atotsiequin aid tantienquo yanoai? ¿Moisesēn dada uapampiduidi namenuequido tanshoda Nuquin Papan mibi bēdamboen ispec? Padenquo. Adquid mētaniacimboecquid nec. ¿Mētaniacimboecquid icoatiadquioda ique?

¹⁰ Aden Nuquin Papa tantienquo icquin mimbi icsamboen chiec. —Aid badiadēn adenda. Aid inchēshēn ushēn adenda. Aid setambi adenuidtsēqui nanuna. Nuquin Papan cuidnushe —quequin mimbi icsamboen chiec. Mimbi chiacpadomboen naquid Nuquin Papan bēdamboen iste danquin mimbi icsamboen chiec.

¹¹ Mibi caic: —Adosh —quesho tantiash shubitiadquo iquebi. —¿Ēmbi chiondaidonda Esus tantienquo yampash? —quequin tantiac mibi unēsquo iquec.

¹² Con utsibobimboecquido mibi neque. Tanta. Mibitedi chuinu. Isadaidpembo yec mibi: —Moisesēn chiampiduidi nanu —quenquo

yacbimboec yanondabi. —Ëmbemi Moisesën chiampid naquin Nuquin Papa bédamboen ismembimbi —quedenedi ënëndondabi. Nëbi Esusuidi tantiaquid nebi. Adembidi Esusuidi tantiata.

Ëbi adsho tantiash chieshenda. Tauamboen ëmbi Esus chuisho mimbi ëbi chieshënenquo iccondac.

¹³ Mibi yacno tauamboec choshon daicsabudtsëcshumbi mibi Esusën naid chuibanondambi.

¹⁴ Istiapicpambo yec daicsabudacshobi mimbi ëbi cacumenquo iccondac. Ëbi mibi yacno puduedsho isash mibi cuishonquiondac. Nuquin Papan abi yacnoshon uaid mayan bëda choacbimboecnuc mibi cuishonquiondac. Nuquin Icho Esuquidistu choacbimboecnubidi mibi adondac.

¹⁵ —Min ëshë chicshun ëbi mene —ëmbi cac mimbi ëbi menetsenondac. Aden ëbi mimbi tantiaquiondac. Adondaidi ¿atotsi quish chieshcueno?

¹⁶ ¿Nëid abimbo chuiquindambi mibi chieshëmpe? Padenquo iquembi. ¿Aden chuisho mimbidabi chieshëmpe?

¹⁷ Ista. Esus chienquo icquidon ambi chiacpadomboen mibi nametiadquo iqueque. ¿Mibi tantiaquioquin bédamboen namenuenda mibi chuipec? Padenquo. Ëbi chieshëmenuembien ambi chiacpadomboen mibi nametiadquo icchitec. Mibi abibi tantiamenuen naic.

¹⁸ Ëmbien mibi tantiaquin Nuquin Papan chiacpadomboen namenuen yuen chuibanon-dambi. Aden chuibanac mimbi ëmbi chiaidquo tantiabenondac. Ëbëd icquimbi Esus bédamboen

tantiaboedombi ëbi nidtsëcnubi mimbi badedi utsi tantiac.

¹⁹ Aden mimbi naid tantiac mibi unësquio iquec. Anin bacuë tantiacbimboen mibi tantiaquiemi. —Esusbimboec icpashun. Aid tantiec ambi chi-acpadec bëdamboec tabadpashun —quequin mibi tantiemi.

²⁰ Mibëd icquin bëisquioquin mibi chuitsiambi. Mibëd iquenguio icquimbi mibi bëisquioquin chi-acbimboen dada uaquin mibi naden chiemi. —¿Atotsieshun Esus tantienquio yanoao? —caimbi.

Abadauanën mado daëd chiaid

²¹ ¿—Moisesën chiacpadomboenuidi naquin Nuquin Papa bëdamboen ismembi —quequido icquinda mimbi Moisesën chiampid bëdamboen tantieque? Tantia. Mibi chuinu.

²² Naden chuiquin Moisesën dada uapampic. Abadauanën madombo daëd icpampic. Aton chidon yuaid chido bedshun tishmiaid abentsëc icnuc aton shanunquio aton chidon tishaid abentsëcbidi icpampic.

²³ Abadauanën chudac badedquio bacuë usundoshon chido yuaidën aton mado tishpampic. Abadauanën chidombo naido icsho: —Mimbi bacuë tishendac —quequin ambi chiacpadomboen Nuquin Papan naidopenquio icmiac aton mado tishpampic.

²⁴⁻²⁵ Aidi Sada nepampic. Chido yuaid Acad nepampic. Aidën tishaid yec aton mado yuabidi nepampic. Icbon chiacpadomboenuidi napampic. Yuaidën madobimboecquido Moisesën dada uapampiduidi namenuequido nec. Adquiobidi Edusaden yacnocquido iquec.

Esus tantienquo yec Moisesën chiaiduidi tantiate bunquiec. Nidaid utsi Adabia caid yacno macuësh dapa Sinai caidënsnun Nuquin Papan ambi chiaid Moises dada uamepampic. Aid macuësh matses utsin Acad capec. Aden tantiaquin: —Chido yuaid Acad caidën madobimboecquido Moisesën dada uapampiduidi namenuequido nec —caombi.

²⁶ Edusaden caid utsi iquec. Nuquin Papa tabadacnombo Edusaden caoapec. Ambo Esus tantiaquido yec nuquibi tabadendac. Yuaidën madobimboecquido Moisesën dada uapampiduidi namenuequidoen padenquo iquendac.

²⁷ Nuquin Papan ambi chiaid dada uamepampicpadec Esus tantiaquido dadpenquo iquendac. Naden dada uamepampic.

“Tantia, chido. Naido icsho mibi chuinu.

Bacuë tishtiapimbo yequi bëdambo icta.

Bacuë paëmbo icnuc tishacmaid yequi cuishon-
queta.

Bënë choquidën bacuë dadpen tishquidën bacuën
tsyuecquido daëdpactsëc yanubi

Bacuë nibëdquidën min matses dadpenquioshë ya-
nendac.”

quequin ambi chiaid Nuquin Papan dada uamepampic.

²⁸ Tantia, con utsibo. Mibi chuinu. ¿Ada Nuquin Papan Abaduan chiampid tantie? —Min chido naido iccondaidën tishaid Isac cuëmëdquidën tsyuecquid tantiaquido bëdamboen isendambi —quequin Nuquin Papan Abaduan chuipampic. Abaduan chiacpadomboen aton Mado Esus

tantiasho Nuquin Papan: —Con mado nec. Con champi nec —nuqui caindac.

²⁹ Ĕnden Nuquin Papan naidopenquo icmiampidĕn mado chieshĕnquin chido yuaidĕn madon aton utsibi chieshĕmpampic. Adembidi Nuquin Papan Mayanĕn tantiamiaido Esus tantiaquido Moisesĕn dada uapampiduidi namenuequividon chieshĕnendac.

³⁰ Aden Abadauanĕn mado bĕyucquidĕn aton utsi chieshĕnsho isun ĵatotsi Nuquin Papan Abadauan chuipampic? “Tantia, Abadauan. Mibi chuinu. Min chidon yuaid aton madobĕdtabi cueme. Min mado utsi Sadan madon tsyuecquido dadpenquo caidmequin bĕdamboen tabadmembĭ. Yuaidĕn madoembĭ padenquo iquendac,” quequin Nuquin Papan Abadauan chiaid dada uapampic Moisesĕn.

³¹ Sada caidĕn mado Isac caidpadquid yuapenquo nuqui nec. Esus tantiasho Nuquin Papan: —Con mado mibi nec. Con champi mibi nec —nuqui caic. —Esusĕnuidtsĕqui Nuquin Papa ĕbi bĕdamboen ismec —quequin Esusquio tantiaquid yec: —Ĕmbembĭ Moisesĕn chiacĕdi naquin Nuquin Papa bĕdamboen ismembĭ —quenquo icnuna.

5

Esus tantiasho Nuquin Papan bĕdamboen iste chĭ-aid

¹ Aden: —Esusĕnuidtsĕqui Nuquin Papa ĕbi bĕdamboen ismec —matses camenuec abided cuidadec Esus unĕspac caondashe. Aidquo tantĭata. Muaquidĕn: —Moisesĕn chiampicpaden nasho Nuquin Papan nuqui bĕdamboen

istsiashe. Aidën chiacpaden nanuna –quequin chuisho tantienda. Aden muaquin chiacpaden naic isadaidbo tsusedpan yuabimboec mibi yantsiaque.

² Mimbi isondaaid Pabado nebique. Tantia. Mibitedi chuinu. Moisesën chiactedi naquid Nuquin Papan bēdamboen iste danquin Esus tantienguo yanec muaquidën chiacpadec shui dēbid dēteshuniadacsho isun Esusën Nuquin Papa mibi bēdamboen ismetiapimbo ictsiashe. Adenda.

³ Aden Moisesën chiaid abentsēc natsēcshun aidën chiaid utsitedi nainquio icsho Nuquin Papan mibi bēdamboen istiapimbo ictsiashe. Moisesën dada uapampiduidi namenuequido tanenda.

⁴ Aido Esus tantiesabo nec. Aden abi bēdamboec ismianquid Esus tantienguo icsho Nuquin Papan aido bēdamboen istiapimbo iquec.

⁵ Esus tantiaquidoen Nuquin Papan Mayanën tantiamiacpaden naden tantiec. –Esus tantiashouidi ambi chiaid niacniacacmaidbimboecnuc bēdamboen isquin Nuquin Papan: “Mibi bēdambo iquec,” nuqui caindac –quequin nuqui tantiec.

⁶ Shui dēbid dēteshuniaidën Esus tantiasho Nuquin Papan bēdamboen isec. Adembidi shui dēbid dētiacmaidontsen Esus tantiasho Nuquin Papan bēdamboen isoaic. Aden Esus tantiabenash: –Ambi chiacpadomboen Nuquin Papan matses tantiaquid ēbi icmendac –quequin aden utsibo tantiasho isun Nuquin Papan: –Adquid con Mado tantiaquid nec –caindac.

⁷ –Bednu –quequin nadancacbimboen

aiduidtsëqui tantiaquin mimbi Esusquo tantiondac. ¿Tsuntsin muaquin chiac Esus tantienquo mimbi yanoape? ¿Atotsiequin abimbo chiaid niacpe?

⁸ ¿Nuquin Papan nacta Esus tantienquo yano? Padenquo. Ma aidëmbi mibi Esus tantiameti-adquo yoc.

⁹ Muaquido tantienda. Nadquo aid iquec. Tosho bedquid abentsëcshun bedmebanac abitedi toshoquecuededec. Adembidi muaquid abentsëcshun chiac matses dadpeshun abimbo tantienquo yantsiashe. Muaid tantienda.

¹⁰ —Nuquin Icbo Esusën tantiamiac ëmbi chiac-padomboen Cadasia yacnocquidon tantiatsiash —quequin mibi chiec nebi. Mibi muaquin chuiquid Nuquin Papan cuidendac.

¹¹ —“Con tsusedpan chiacpaden shui dëbid dëteshunaiduidtsëqui Nuquin Papan bëdamboen istsiash,” queposh Pabado —quequin ¿tsundanquieni muauapac caosh? ¿Adendambi chuidio? Aden ëmbi chuisho adembidi chuiquidon chieshënenquo ictsenoshi. Esus chienquo icsho ëbi chieshënenquo ictsenosh. Abi tantiaquid cuidmenquo icnuec abided cuidadec unësaid Esusuidi chuisho mabi chieshëmpaboc.

¹² Mibi muaquin chuiquido Moisesën dada uapampiduidi namenuquido caic: —Auëshquo cuemepashun —caimbi.

Esus tantiaquido bëdamboec tabadte chiaid

¹³ —Ëbi cuidmenquo icnuec abided cuidadec unësaid Esusquo tantiasho Nuquin Papan ëbi bëdamboen isec —camenuen Nuquin Papan mibi

Esus tantiamiac. Adoac: —Esus tantiasho Nuquin Papan cuidtiapimbo iquebique. Ēbi icsate bunaid nanu —quenda. Nēbi Esus tantiaquin mibi icsate bunaid ēnquin mēmunta. Esus tantiaquido yec tantiananquiec nashunanta.

¹⁴ Adomboen Nuquin Papan Moises naden chuimiapadomboen mimbi natsiac. “Mibibi min dada datantiadacimboen utsibotsen bēdamboen tantiaquiota,” quequin Nuquin Papan ambi chiaid Moises dada uamepampic.

¹⁵ —Opa penantiadpambo yacbimboec nēishnanash chushcananosh —quiosh mibi caic. Aden naic mibi icsacuededeque. Esus tantienquio mimbi yaneque. Bēdamboec tabadta.

Nuquin Papan Mayanēn bēdamboen tabadmete

¹⁶ Nuquin Papan Mayanēn tantiamiacpadomboen naic bēdamboec tabadta. Aden mibi icsate bunaid mimbi nainquio ictsiac.

¹⁷ Nuqui icsate bunaid naiqui Nuquin Papan Mayanēn tantiamiacpadec bēdamboec tabadtiapimbo nuqui ictsiac. Nuquin Papan Mayanēn tantiamiacpadomboen tantiaquin nuqui icsate bunaid ēnquin nuqui mēmuntsiac.

¹⁸ Nuquin Papan Mayanēn tantiamiacpadomboen tantiec: —Esusēnuidtsēqui Nuquin Papa ēbi bēdamboen ismec —queshun: —Moisesēn chiactedimbo naquin ēmbimbo Nuquin Papa bēdamboen ismembi —quequin tantienquio nuqui iquec.

¹⁹ Nadquio icsateuidi bunquid matses iqueque. Tantia. Chuinu. Nēidic aton chidopenquio chudquido. Nēidic aton bēnēpenquio chudmequido. Nēidic dada daēd

chichudnanquido. Nēidic opabimboec chudnante bunquin matses ismequin adoquido. Nēidic tsienbēdta shui chuibudquin icsamete bunquido.

²⁰ Nēidic Nuquin Papan chiaid niac-niacquin ambi matsesbimboecnuc nacnenaiddi papa caquido. Nēidic nēnēchoquido. Nēidic dauē icsa bedash icsa uanquido. Nēidic chieshēmēnquido. Nēidic chieshēmēnec chushcananquido. Nēidic cudasquido. Nēidic nēishēmēnquido. Nēidic ambi naiduidi naquido. Nēidic abitedi cuēsh-cuēshēdmianquido. Nēidic: —Utsin chiaid tantiatiapimbo iquebi. Ēmbentsēqui bēdamboen chiemi—quequido.

²¹ Nēidic utsin na natiambo bunec chieshēmēnquido. Nēidic tantiadenuen paēambo icquid acquido. Inchēshēn ushenquio icquin adoquido. Adquidtedishun icsamboen naic. Adec abi icsaid ėntiapimbo yec unēsash Nuquin Papa yacno tabadiapimbo iquec. Aden mibi chuibanondambi ėnden.

²² Padnuen Nuquin Papan Mayanēn namiaid yec nadquiec tabadquid. Nuquin Papabēdta matses tantiaquiec tabadquid. Ēsus tantiec cuishonquec tabadquid. —Nuquin Papan ėbi bēdamboen isec—quec bēdambo yec dacuēdenquio yec tabadquid. Utsibon chieshēnaqui chieshēmēnenquio yec tabadquid. Nēishēmēnenquio yec tabadquid. Bēdamboen isquin utsibo nashunec tabadquid. Muainquio yec tabadquid Nuquin Papan namiaid.

²³ —Con nauidi naimbi. Ēbiuidtsēqui bēdambo iquec —quenquio icquin utsibo bēdamboen tantiec tabadquid. Abi icsate bunaid ėnquin

mëmunec tabadquid. Adquio yec Nuquin Papan Mayanën namiaido Esus tantiaquido bëdamboec tabadtsiash. ¿Adec bëdamboec tabadsho isunda: —Adec tabadenda —quequin Nuquin Papan Moises dada uamepampic? Padenquio. — Icsamboec tabadenda —quequin icsamboec tabadquid chuiampic. Nuquin Papan Mayanën tantiamiacpadec tabadquin aden chuiampid nuqui niaquenquio iquec.

²⁴ Adoenquio icquin cuesten dectanac abided cuidadec unësaid Esus tantiaquin nuqui icsate bunaid ënquin nuqui mëmuntsiac.

²⁵ Aden icsamboen nainquio yec bëdambo icnuna. Nuquin Papan Mayanën Esus tantiamiaid icquin aidën tantiamiacpadomboen nanuna.

²⁶ —Ëbiuidtsëqui bëdambo iquec —quenda. Adenquio yec nuqui chuiquid dëniacte bunenquio yec bëdamboec tabadnuna. —Ëbi bunacpaden ëbi namianenquien icchitec. Utsien namechitec — quec chieshëmë nec tabadenda. Nëishnanenquio yec bëdamboec tabadnuna.

6

Esus tantiaquido bëdamboec isnante chiaid

¹ ¿Nuquin Papan Mayanën tantiamiacpadomboen bëdamboen tantiaquidta icpec? Adquidën abëdtan Esus tantiaquidën icsamboen nasho isun: —Padi. Esus tantiaquid adesambo neque. Bëdamboec tabadta —caquid yendac. —Nëishec ëbitsen icsamane —queshun nëishenquio icquin aden chuiquid yendac. Abibi datantiadec: — Icsaquid nebi. Esus bëdamboen tantienquio yec

adecbidi icsatsiabi —quequin tantiec: —Bëdamboec tabadta —quequid yendac.

² Adec bëdamboec isnanc: —Bëdamboec tabadnuna —quec chuinanquiota. Adecbidi nashunanquiota. Aden naquin Nuquin Icbo Esuquidistun chiacpadomboen mimbi natsiac.

³ Utsien: —Utsibëd onquetiapimbo iquebi. Èbiuidtsëqui bëdambo iquebi —quec abibi muauadquid icsambo iquec.

⁴ Adenquoio yec mibibi datantiadta. —¿Nuquin Papan chiacpadectabi bëdamboec tabadpe? —quec mibibi datantiadta. Adashic: —Ai, Nuquin Papan chiacpadec tabadebi —quiash adecbidi bëdambo icta. —Utsitedi icsambo icnubi èbiuidtsëqui bëdambo iquebi —quenda.

⁵ ¿Mimbi utsibon naid chuibanshoda Nuquin Papan: —Mibi bëdambo iquec —capatsiash? Padenquoio. Mimbi bëdamboen naid isun: —Mibi bëdambo iquec —catsiash.

⁶ Esus tantiaquidon nadoquid yendac. Nuquin Papan chiaid abi chuibanquid nashunquid yendac.

⁷ Piacbo sequidbimboec matses iquec. Tantienuo icquidën icbompin uestsaidi siac canienquoio ictsiash. Padnuen tantiaquidën èshë bëdaidquoio siac bëdamboec canitsiash. Tantienuo icquidbimboec icsambo icquid iquec. Ambi icsamboen naid icbompin uestsaidbimboec iquec. Icsauidequi tabadec unësash Nuquin Papa yacno nidtiapimbo iquec. Padnuen Esus tantiaquid ambi chiacpadomboen naic unësash Nuquin Papa yacno nidendac. Èbi adsho tantiash: —Icsaido Nuquin Papan cuidenquoio ictsiash —quec muaic

tabadenda. Ambi chiacpadomboen mibi cuidendac.

⁸ Ambi chiaid niac-niaquec abi icsate bunaiduidi naquid cuidendac. Nuquin Papan Mayanën tantiamiacpadomboen naquidien bēdamboec tabadec unēsash Nuquin Papa yacno tabadendac.

⁹ Ęmbi aden chuisho tantiash bēdamboec tabadta. Bēdamboec tabadec chieshtoenquo icsho isun ambi tantiacpadën Nuquin Papan abēdi nuqui tabadmendac.

¹⁰ Adec bēdamboec tabadquin utsibo bēdamboen isquin nashununa. Aden utsibo bēdiactsēc tantiec Esus tantiaquido yec tantiananquiec nashunanquionona. —Shubu abentsēquën tabadquidobimboec Esus tantiaquido iquec —queshun adonona.

Pabadon ěnquimbi chiaid

¹¹ Is. Nua-nua icnuc dada uaquin ěmbimbo ěnquimbi dada uanu.

¹² Muaquin chuiquidon mibi con tsusedpan chiacpadomboenuidi nametiadquo iqueque. Aidon chuisho tantienda. Con matses isadaidbo: —Mibi bēdambo iquec —camenuen mibi adometriadquo iqueque. —Esusuidi chuisho con matsesën chieshēnquin cuidnushe. Moisesën chiacpadomboen namenu —quequin mibi shui dēbid dēteshunemetiadquo icchitec. Aido muasho tantienda.

¹³ Aden mibi: —Adota —caquidombi Moisesën chiatedi nainquien icchitec. Adquid yec: — Is. Bēdambo iquebique. Ęmbi chiacpadomboen nēidon naosh —quenuembien mibi shui dēbid

dëteshunemetiadquio icchitec. Aidon chiacpadom-boen nainda.

¹⁴ Èbien adtiapimbo iquec. Esus tantiesabim-boec: —Èbibi bëdambo iquebi —quetiapimbo iquebi. Esusuidtsëqui bëdambo iquec. Abi tantiaquid cuidmenquio icnuec abided cuidadec unëspac caondash cuesten dectanac. —Aidquio tantiec bëdambo iquebi —caimbi. Aden Esus tantiec: —Èmbimbo Moisesën chiactedi naquin Nuquin Papa bëdamboen ismembi —quec ënëdondabi. Adecbidi Esus tantiec ëbi bunaid ënash icsate bunenquio iquebi.

¹⁵ —Moisesën chiactedi naquiduidi Nuquin Papan bëdamboen istsiash —quetiapimbo iquebi. Shui dëbid dëteshunaidëmbi Esus tantienquio icsho Nuquin Papan cuidtsiash. Adembidi shui dëbid dëtiacmaidën Esus tantienquio icshobidi cuidtsiash. Nuquin Papan Mayanën chuca uaidien Esus tantiaquid Nuquin Papan bëdamboen isquin bëdamboen tabadmec.

¹⁶ Èmbi aden chuisho tantiash: —Ai, abimbo mimbi caique. Adonona —quesho: —Aido Nuquin Papan bëdamboen isquin bëdambo icmepashun —caimbi. Adquido Nuquin Papan: —Con mat-sesquio nec —caindac.

¹⁷ —Abimbo chienquien icchitec —ëbi cainda. Esusën chiaidquio chiombi. Aidquio tantiaquin ambi chiacpadomboen nabanta. Èmbi Esusën chiacpadomboen nasho isun chieshënquin cuesan-iondashi. Cuesonaid bish abi iquec.

¹⁸ Tantia, con utsibo. Mibi Nuquin Papa chianembi naden. —Mimbi nabocpadomboen con Icho Esuquidistubëdtan Cadasia yacnocquido

bëdamboen ista, Papa —quequin Nuquin Papa chianembi. Padi. Aidedi chuiquin dada uaombi.

Esuquidistu Chuiquin Tantiamete New Testament in Matsés (PE:mcf:Matsés)

copyright © 2008 Wycliffe Bible Translators, Inc.

Language: Matsés

Translation by: Wycliffe Bible Translators, Inc.

Matsés [mcf], Peru

Copyright Information

© 2008, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Matsés

© 2008, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-30

PDF generated using Haiola and XeLaTeX on 18 Apr 2025 from source files
dated 29 Jan 2022

446da786-5bd1-5ffa-85e2-9eff4052cf8b